

Surat khabar: Harian Metro (Setempat)

Hari/Tarikh: 31/8/2013

Muka surat: 20

Tajuk : Wanita Monopoli IPT Sarawak.

Wanita monopoli IPT Sarawak

Kuching: Sebanyak 60 hingga 70 peratus pelajar institusi pengajian tinggi di negeri ini dimonopoli kaum wanita, sekali gus menunjukkan sistem pendidikan negara ini tidak pernah mengamalkan pilih kasih.

Menteri Kebajikan, Wanita dan Pembangunan Keluarga Datuk Fatimah Abdullah berkata, peningkatan yang ditunjukkan wanita itu juga hasil komitmen ditunjukkan komposisi gender itu untuk memajukan diri.

Menurutnya, dasar pendidikan yang ada sekarang menjadi titik tolak kepada kaum wanita khususnya di Sarawak untuk terus bersaing dan turut mengubah senario pendidikan dari peringkat sekolah rendah

hingga ke peringkat universiti.

"Hampir 49 peratus penduduk Sarawak terdiri kaum wanita dan kemasukan mereka ke institusi pengajian tinggi awam dan swasta di sini melebihi 49 peratus.

"Sebagai contoh, saya difahamkan pelajar perempuan mewakili hampir 60 peratus bagi kemasukan baru Universiti Malaysia Sarawak (UNIMAS) malah menurut rekod daripada 7,541 pelajar UNIMAS antara 1999 hingga 2009, 63.6 peratus daripada mereka adalah pelajar perempuan," katanya.

Beliau berkata demikian ketika berucap merasmikan Perhimpunan Khas Perhimpunan Khas Ambang Merdeka Sekolah Menengah Ke-

bangsaan St Teresa di sini, semalam.

Hadir sama, Pengetua sekolah berkenaan, Mary John dan Penolong Pengarah II Arkib Negara Malaysia cawangan Sarawak Anita Muhammad Ishak.

Mengulas lanjut, Fatimah berkata senario perubahan itu jelas menunjukkan sistem pendidikan negara yang berubah berbanding 50 tahun dulu dengan memberikan peluang sama rata tanpa mengira gender.

"Jika dulu lebih ramai kanak-kanak lelaki dihantar bersekolah berikutan kesusahan keluarga, kini peluang untuk belajar terbuka kepada semua sama ada lelaki atau perempuan, kaya atau miskin," katanya.



FATIMAH (tengah) menerima cenderahati daripada Mary selepas merasmikan Perhimpunan Khas Ambang Merdeka di Dewan Sekolah Menengah Kebangsaan St Teresa, Kuching.